

Saksnr: 2020/36933-8
Saksbehandlar Katharine Louise Clarke
Dato: 04.06.2020

Til: Vestlandsrådet


Frå: Fylkesrådmannen

Fakta om Nordsjøkommisjonen - NSC

Nordsjøkommisjonen (NSC) er ein politisk organisasjon som vart oppretta i 1989 som ein arena for regionar rundt Nordsjøen for å samordne interesser, utveksle erfaringar og utvikle politikk. Organisasjonen er ein av seks europeiske kommisjonar under paraplyorganisasjonen «Conference for Peripheral and Maritime Regions» (CPMR). Alle dei tre vestlandsfylka er medlem i CPMR og NSC. Medlemskap i CPMR og NSC gir fylkeskommunar frå ikkje-medlemslandet Noreg eit unikt handlingsrom og moglegheiter for å påverke den europeiske dagsordenen.

Presidenten og to vise-presidentar styrer NSC saman med ein styringskomité (Executive Committee, ExCom). ExCom har ein representant frå kvart land som har medlemmar i organisasjonen. Marianne Chesak frå Rogaland har vore norsk medlem i styret dei siste åra, medan Andreas Lervik frå Østfold har vore ein av to vise-presidentar i perioden 2016-2020.

Det overordna avgjerdsorganet er Årsmøtet, som finn stad kvart år i juni i samband med Nordsjøkonferansen.



NSC har laga ein Nordsjøstrategi som skal vere styrande for arbeidet i organisasjonen. Noverande strategi er frå 2009 og varer fram til 2020. Kommisjonen har fire tematiske arbeidsgrupper som

arbeider med innsatsområde knytt til Nordsjøstrategien. Gruppene arbeider med politikktutforming, prosjektutvikling og utveksling av kunnskap, og er ein viktig politisk arena som også gir gode høve for fagleg samarbeid. Strategien vert operasjonalisert gjennom arbeid i dei tematiske gruppene. Ein administrativ rådgjevar leier arbeidsgruppene, medlemmar kan velje kor aktivt dei ønskjer å vere og i kva grupper dei ønskjer å delta. Gruppene møter tre-fire gongar i året.

Nordsjøstrategien skal sikre at det politiske påverknadsarbeidet opp mot EU sine avgjerdsorgan og nasjonale myndigheiter er forankra hos medlemmane i organisasjonen. Den gir føringar for kva problemstillingar medlemsregionane skal samarbeide om. Nordsjøkommisjonen ønskjer også å bruke strategien til å påverke utforminga av det nye Interreg Nordsjøprogrammet, som no er under utarbeiding. Prosjektmidlar frå Interreg Nordsjøprogrammet er hovudverktøyet vi har for å gjennomføre tiltaka og realisere måla i strategien.

Nordsjøkommisjon etablerte i 2019 ei arbeidsgruppe med eit utval av ekspertar frå medlemsorganisasjonane med oppdrag om å utvikle ein ny strategi for perioden 2020-2030. Kunnskapsgrunnlaget for den nye strategien er utarbeidd internt i Nordsjøkommisjonen. Dei tematiske gruppene har diskutert strategien og bidrege til formuleringar og innhald. Strategien har vore ute på høyring blant medlemmane. Årsmøtet skal vedta den nye strategien på årsmøtet. Årsmøtet er førebels utsett til hausten 2020.

NSC ønskjer å satse meir på medverknad frå ungdom og har nettopp tilsett ein ungdomsrådgjevar som skal sikre ungdomsdeltaking og samle innspel og synspunkt på politiske tema NSC arbeider med.